

'A televisione

Prima eranu
atri tempi
'un c'era a televisioni
e a genti
cu vicini e parenti
stava in cuminione.
La matri la sira
cu li figghi
nì la vicina curria
mentri 'u maritu
a lu circulu s'innia.
E ognunu
lu sirvizzeddu avia:
cu cusia,
cu a quasetta facia
e cu jucannu a li carti
si divirtia.
Lu lumi l'ummira
facia trimari
mentri sutta ogni seggia
nà tannuredda
li ammi facia quariari.
E quantu cuntura
a vicchiaredda
a li picciotti sgranova
e quanta paci
'a stanza ammantava!
Lu rusariu poi si dicia
e a so' cantilena
l'arma arrifriscava

chi li cosi di lu celu
assapurava.

Atri tempi,
avutri valuri.

Ora 'nveci a televisioni
'a famigghia ruvinau.

A casa si sta
senza parlari
e sempri misi
a taliari.

Ora nun si parla
chiù di nenti
e a modernità
sta arruvinannu
a nostra menti.

Lu 'spitali

L'omu è spertu
sicuru e decisu
finu a quannu
'ncruci nun è misu.
Si senti lu patruni
di lu munnu
ma poi nì li malatii
l'omini nuddu sunnu.
Basta iri a lu spitali
pi sentisi
'u corpu nimicu
e ni la vita nicu nicu.
'Nchiuvatu
nù lettu a suffrirri
si senti ogni jornu
murìri.
Fineru li sciarri,
li sordi, lu putiri
e capisci chi forsi
è ura di sta terra partiri.
Sulu allura
l'omu s'adduna
chi vali picca nà pirsuna.
Vali sulu a l'avutri
nà manu dari
e cu soffri cunsulari,
vali un surrisu,
'na parola bona
chi a lu cori porta 'na carizza

e pì l'aricchi è 'na ducizza.
Nì stu postu si capisci
chi semu proprio nenti
e nì resta sulu l'amuri
chi accumuna li genti.



'U cimiteru

Ogni duminica
aiu lu pinseri
di 'u cimiteru visitari
e ricurdari
li me' cari murticeddi
chi su ddà a ripusari.
'N cumpagnia
di la mè tristizza
e cu quatru ciuri
nì li manu
pì li viali m'inni vaiu
chianu chianu
Tanti occhi in fotografia
mi talianu e
parlanu a mia.
Mi dicinu
chi 'a morti a iddi
à 'nchiuvatu
amuri e sentimenti
e chi ni lu munnu
semu nenti.
Mi dicinu:
'U vidi nì la morti
semu tutti pari
e un cunta chiù
aviri dinari.
Nun c'è chiù
scarsu e riccu
e cà riposa puru
lu sceiccu.

Nun c'è chiù
cuntintizza né affannu
e nun c'è mancu nu malannu".
Poi cu li me tristi pinseri
ogni vota a casa tornu
e cu atri occhi
mi taliu 'ntornu.

'U cimiteru è un postu
pi' farini pinsari
chi a li cosi
di lu munnu
unn'avemu attaccari.

Lu cunzulu

Quannu eramu
picciriddi
a morti 'mpressioni
nun facia
picchì poi divintava
mumentu d'alligria.
Li lacrimi subitu
s'asciugavanu
e comu nu misi di marzu
li jurnati boni spuntavanu.
Quannu muria qualcunu
lu cunsulu si facia.
Assemi a li parenti
si manciava
e a niatri picciriddi
la tristezza scumparia.
Ricordu
scrusciu di piatti
di cucchiara e furchetti
e cu lu brodu
li sapuriti purpetti.
Era tempu di giovintù.
Era tempu chi a la morti
nun ci pinsavi tu.


'A fidi

Aviri fidi
è 'na cosa miravigghiusa.

A campari
tu nun ti spaventi
si l'amuri di Cristu
nì lu cori senti.
A Iddu affidi
tutti li to peni
e sai chi pi' tia
Cristu voli lu beni.

Nun ti manca
mai lu so amuri
e Iddu du to cori
vidi puru li gnuni.
Si nì li so vrazza santi
t'abbannuni
di la vita cu pacenzia
supporti lu duluri.

La fidi
è nà ranni midicina
e l'arma
di spiranza
è sempri china.



Cristu 'ncrucci

'A chiesa

Mi recordu
quannu picciridda
a la chiesa cu me matri
m'innia e a li voti
iu m'addummiscia.

Ricordu
lu parrinu supra lu pulpitu
chi pridicava e cu li sò paroli
lu me cori attristava.

Tutti currianu
nì la chiesa pi' farisi ammirari
e anchi pi' priari.

Li masculi a li fimmuni
'na taliatedda davanu
e iddi tra un credu,
e un patri nostru
di suttocchju lu vidianu
e di sì rispunnianu.

La chiesa, tannu,
era sì un locu di priera
ma sirvia anchi comu nà fera.

La parola di Diu
si pruclamava
e la picciuttedda
mentri s'innamurava.
Ora li tempi su' canciati
e li poveri santi abbannunati.

'Nna chiesa

Spissu
dintra nà chiesa
vaiu a rifriscari
l'arma mia
malata di malincunia.
E nù silenziu
davanti a Cristu 'ncrucci
a Iddu aisu la me vuci
e ci dicu
di a mia pirdunari
si la sò vuluntà
mi veni duru fari.
E addumannu pietà
e misericordia
pi' tutti li miserii di la terra
pi' tutti l'omini di lu munnu,
chi afflitti e piatusi sunnu,
pi' tutti chiddi
chi soffrunu la fami,
pi' li vecchi
chi sunnu abbannunati
e pi' chiddi
chi sunnu malati.
E fazzu nà priera particolari
pi' li picciotti di 'sti tempi
chi di la vita
nun hannu caputu nenti.
La paci nì li famigghi
e ni tuttu lu munnu
a Iddu raccumannu

pirdunu addumannu
pi' chiddi
di la vita si nni vannu.
Poi a Cristu affidu
lu me cori
e nì li so vrazza m'abbannunu
comu fa nnà la chiesa ognunu.